

GARIZUMAKO III. IGANDEA (A)

Otoitza

Errukiaren Aita eta on guztien iturria zaren Jauna,
baraua, otoitza eta limosna
ipintzen dizkiguzu geure bekatuen sendagarri;
begira bihotz onez
bere ahuleria aitortzen duen zeure herriari,
eta bizkor gaitzazu, zeure erruki haundiz,
bekatuaren zamapean aurkitzen garenok.
Zure Seme Jesu Kristo.

I. IRAKURGAIA: Ex 17, 3-7

Emaguzu ura edateko.

Exodo liburutik

Egun haietan, herria egarri zen, eta Moisesen kontra marmarka ari zen: «Zertarako atera gaituzu Ejiptotik? Egarriz hiltzeko gu eta gure seme-alabak eta gure abereak?» Moisesek Jaunari hotsegin eta esan zion: «Zer egin behar dut herri honekin? Harrika emango didate laster».

Jaunak Moisesi: «Jar zaitez herriaren aurrean, eta eraman itzazu zerorrekin Israelgo zahar batzuk; hartu eskuan, ibaia jotzeko erabili zenuen makila, eta zoaz. Ni zure aurrean egongo naiz, Horeb mendiko harkaitz gainean. Zuk harkaitza jo, eta ura sortuko da handik, eta edango du herriak».

Hala egin zuen Moisesek, Israelgo zaharren aurrean. Eta toki hari Masa eta Meriba ezarri zion izen, israeldarren hango haserreagatik eta han tentatu zutelako Jauna, esanez: «Gure artean al dago Jauna, bai ala ez?»

ERANTZUN SALMOA: Sal 94, 1-2. 6-7abc. 7d-9

**R/. Entzungo al duzue gaur Jaunaren mintzoa:
«Ez gogortu zuen bihotzak».**

Zatozte, pozez oihu degiogun Jaunari,
txalo degiogun salbamen dugun Harkaitzari.
Hurbil gakizkion aurrera esker-kantuekin,
jai degiogun txalo eta eresiekin. R/.

Zatozte, ahuspez jaurets dezagun,
egin gaituen Jaunari belaunika gakizkion.
Bera baita gure Jainkoa,
gu, berriz, Haren larreko herria,
Haren zainpeko artaldea. R/.

Entzungo al duzue gaur Haren mintzoa:
«Ez gogortu zuen bihotzak Meriban bezala,

Masa-egunean basamortuan bezala.
Zuen gurasoek han zirikatu ninduten,
Nik eginak ikusi arren, tentatu ninduten.» R/.

II. IRAKURGAIA: Erm 5, 1-2. 5-8

*Jaungoikoaren maitasuna gure bihotzetara isuria dago,
eman zaigun Espiritu Santuaren bitartez.*

San Paulo Apostoluak Erromatarrei

Senideok: Fedearen bidez zuzentasuna iritsi dugunez gero, bakean gaude Jaungoikoarekin, Jesu Kristo gure Jaunaren bitartez. Berari esker zabaldu zaigu, sinesmenaren bidez, bizi garen grazia honetarako sarrera, eta harroturik gabilta Jainkoaren seme-alaben aintzaren itxaropenean.

Itxaropenak ez du hutsegiten; Jaungoikoaren maitasuna gure bihotzetara isuria baitago, eman zaigun Espiritu Santuaren bitartez. Izan ere, oraindik indargabe geundela, Kristo, bere orduan, gaiztoen alde hil zen. Nekez hil daiteke norbaikizaki zuzen baten alde; gizaki on baten alde, baliteke norbaitek hil nahi izatea.

Baina, honetan erakusten du Jaungoikoak guretzat duen maitasuna: gu bekatari ginelarik, Kristo gure alde hil baitzen.

EBANJELIOA: Jn 4, 5-42

Ebanjelio aurreko txatala: Ik. Jn 4, 42c. 15b

V/. Jauna, Zu zara egiaz munduaren Salbatzailea;
emadazu ur bizia, egarri ez nadin.

*Ur hau, betiko bizitzaraino darion iturri
bihurtuko da.*

Jesu Kristoren Ebanjelioa San Joanen liburutik

Aldi hartan, Jesus Sikar deritzan Samariako hiri batera iritsi zen, Jakobek bere seme Joseri emandako soro ondora. Han zegoen Jakob en iturria. Jesus, bidean nekatuta, iturri ondoan eserita zegoen. Eguerdi ingurua zen.

Samariako emakume bat etorri zen ura ateratzera, eta Jesusek esan zion: «Emadazu edateko». (Ikasleak hirira joanak ziren, jatekoak erostera).

Eta emakume samariarrak: «Nola zuk, judutar izanik, eskatzen didazu edatekoa, emakume samariarra naizen honi?» (Judutarrek ez baitute harremanik samariarrekin). Jesusek erantzun:

«Bazeneki Jaungoikoaren dohaina zer den,
eta "emadazu edateko" esaten dizuna nor den,
zeuk eskatuko zenioke,
eta Hark ur bizia emango lizuke».

Emakumeak orduan: «Jauna, ez daukazu ezer ura ateratzeko, eta urtzuloa sakona da; nondik atera behar duzu Zuk ur bizi hori? Gure aita Jakob baino handiagoa ote zaitugu Zu? Hark emana dugu urtzulo hau; eta hemendik edaten zuten hark eta haren seme-alaba eta abereek». Jesusek erantzun:

«Ur honetatik edaten duena,
berriz ere egarritu egiten da.

Nik ematen diodan uretik edaten duena, ordea,
ez da gehiago egarrituko sekulan;

Nik emango diodan ura,
betiko bizitzaraino darion iturri
bihurtuko da harengan».

Eta emakumeak: «Jauna, emadazu ur hori, egarri ez nadin, eta ur bila hona etorri beharrik izan ez dezadan». [Eta Jesusek: «Zoaz; deitu zeure senarrari, eta etorri hona». Emakumeak erantzun zion: «Ez dut senarrik». Eta Jesusek berari: «Ongi esan duzu, ez duzula senarrik; bost izan dituzu, eta orain zeurekin daukazuna, ez duzu senarra; hori egia esan duzu». Emakumeak: «Jauna,] ikusten dudanez, profeta zara Zu. Gure gurasoek mendi honetan gurtu zuten Jainkoa; eta zuek Jerusalemen gurtu behar dela diozue». Jesusek:

«Sinets iezadazu, emakume:

badator ordua,

ez mendi honetan, ez Jerusalemen,

Aita gurtuko ez duzuen.

Zuek, ez dakizuen gurtzen duzue;

guk, dakiguna gurtzen dugu;

salbamena judutarrengandik baitator.

Baina badator ordua, eta iritsi ere bada,

egiazko gurtzaileek

Aita espirituz eta egiaz gurtuko dutena.

Izan ere, Aitak honelako gurtzaileak nahi ditu.

Jaungoikoa espiritua da;

eta Hura gurtzen dutenek,

espirituz eta egiaz gurtu behar dute».

Emakumeak orduan: «Badakit, bai, Mesias, Kristo deritzana, etortzekoa dela; Hura datorkigunean, Hark adieraziko digu guztia». Eta Jesusek: «Neu nauzu, zurekin hizketan ari naizen hauxe».

[Une hartan etorri ziren ikasleak, eta harritu ziren, emakume batekin hizketan ari zelako. Hala ere, ez zion inork esan: «Zer galdetzen diozu?», edota «zertaz ari zarete?» Orduan emakumea, bere ur ontzia han utzi eta hirira joan zen, eta jendeari esaten zion: «Zatozte eta ikus, nik egindako guztia esan didan gizona. Mesias ote dugu?» Eta hiritik atera eta Harengana zihoazen.

Bitartean, ikasleak arrenka ari zitzaizkion: «Maisu, jan ezazu!» Harek, berriz, honela esan zien:

«Badut Nik jateko,

zuek ez dakizuen janaria».

Ikasleek honela zioten elkarri: «Inork ekarri ote dio, bada, jatekorik?» Eta Jesusek:

Hau dut Nik janari:

bidali nauen Haren nahia egitea

eta Haren lana burutzea.

Ez al zarete esaten ari:

"Oraindik lau hilabete, gari-ebakitzerako?"

Horra, bada, Nik esan:

jaso zeuen begiak,

eta ikus gari soroak, igitaitzeko hori-hori.

Eta dagoeneko ari da igitaria lan saria hartzen

eta betiko bizitzarako uzta biltzen;

ereilea eta igitaria,

biak batera poz daitezen.

Hala ere, egia da harako esaera hura:

"Batek erein, eta bestek bildu".

Zeuek landu ez duzuen

igitaitzera bidali zaituztet:

bestek lan egin
eta zuek haien lanean sartu zarete».]

Hiri hartako samariar asko Harengan sinesten hasi zen, [emakumearen hitzarengatik; «egin dudan guztia esan dit», aitortu baitzuen.] Samariarrek, Harengana etorri zirenean, haiekin gelditzeko eskatzen zioten. Eta han gelditu zen bi egun. Eta Beraren hitzarengatik gero eta gehiagok sinetsi zuten. Eta emakumeari esaten zioten: «Orain ez dugu, zuk esan duzunagatik sinesten: geuk entzun diogu, eta badakigu Hau dela egiaz munduaren Salbatzailea».

Oparigaien gainekoa

Opari honek, Jauna, irits diezagula
eskatzen dizugun barkamena,
eta geure zordunei barkatzera eraman gaitzala.
Jesu Kristo.

Jaunartze ondorengoa

Betiko salbamenaren agiria dugu, Jauna,
hartu dugun oparia;
egizu, orain sakramentuz ematen zaiguna
bere betean irits dezagula geroko bizitzan.
Jesu Kristo.